



Inatsisartut suleriaasianni kapitali 11 § 36 naapertorlugu apeqquteqaat aallavigalugu oqallinnissamut siunnersuut imaattoq matumuuna saqqummiuppara:

Kalaallit Nunatsinni nunat immikkoortuisa, imartallu assigiinngitsut, qeqertallu atserorneqarsimanerisa allangortinneqartariaqannginneri pillugit apeqquteqaat aallavigalugu oqallinnissamik siunnersuut.

(Inatsisartunut ilaasortaqaq Karl Lyberth, Siumut)

Tuungavilersuut:

Kalaallit Nunaanni nunat aqqi pillugit inatsit nr. 555, 30. november 1983-imeersup akuersissutigineratigut, Kalaallit Nunaanni Namminersorlutik Oqartussat piffinnik Kalaallit Nunaata oqartussaaffigisaanniittuni nunanik atsiisarnermut maleruagassiorsinnaanermut oqartussaaffik tiguaat. Inatsit naapertorlugu taamanikkut Inatsisartuusut 1989-imi Kalaallit Nunaanni nunat aqqinut aalajangiisartut pillugit Inatsisartut inatsisaat nr. 11, 26. oktober 1989-imeersoq akuersissutigaat. Inatsillu Kalaallit Nunaanni nunat aqqinut aalajangiisartut pillugit Namminersornerullutik Oqartussat nalunaarutaat nr. 22, 15. maj 1990-imeersumik tapertalerneqarpoq.

Kalaallit Nunaanni nunat aqqinik katersinissaq, nalunaarsuinissaq pisortatigoortumillu akuersissuteqarnissat Kalaallit Nunaanni nunat aqqinik aalajangiisartut suliassaraat, tassunga ilanngullugit allanneqarnerinut tunngasut naalisaanerillu; matumani aqqusernit illoqarfinnilu piffiit aqqi ilanngunnagit. Taamatuttaaq aalajangiisartut Kalaallit Nunaanni nunat aqqi pillugit apeqqutinut pisortanik innuttanillu ilitersuinissaq suliassaraat. Maleruagassanittaaq aalajangiisartut suliartik pillugu ukiumoortumik nalunaarusiamik saqqummersitsisarnissaat allassimavoq.

Kalaallit Nunaanni nunat aqqinik aalajangiisartut suliassaat ullumikkut Oqaasileriffimmit isumagineqarput.

Imaluunniit aamma qularnanngitsumik allamiut atsesorsimasaat assigiinngitsut siuaasatta namminneq taaguuteqartereersimassagaat qularnanngilaq. Taakkua siuaasatta taaguutigigitai pisortatigut ateritinneqarunik pissusissamisuuinnginnerluni?

Nunatta namminersulersimanera eqqarsaatigalugu isumaqarpunga pissusissamisoortoq aamma piffissanngortoq nalilersussallugu nunatsinni nunanut, imartatsinnut, kangerlunnut, qeqertanut allanullu sunut nunani allamiut kikkuusimagaluarnersut aterpassuisa atsiussimaneri eqqortuunersut.

Fynske Alper, Køge Bugt, Germania Land, Nyeboe Land, Washington Land, Inglefield Land, Nuna Kunngissaq Frederik, Kap Prins Knud, Watkins Bjerger, Prinsen af Wales Bjerger, Hertugen af Orléans Land, Kong Christian IX Land, Cap Ravn, Liverpool Land, Lille Pendulum,

Walterschausen Gletscher, Academy Gletscher, Carlsberg Fjord, Kejser Frans Josef Fjord, Norske Øer, Franske Øer, Danas Banke, Fyllas Banke, Lille Hellefiske Banke, Bildsøe Nunatakker, Alabama Nunatakker, Ymer Nunatak, ilaalu ilanngullugit.

Soormi:

Quloqutsuup Qaqqarsui, Kangerluk, Junnuup Nunaa, Tuusip Imarsua, Angakkorsuup Nunaa, Aapakuup Nunaa, Agnethe Nielsen-ip Nunaa, Kaassassuup Qaqqarsui, Hans Enoksen-ip Qaqqarsui, Otto Steenholdt-ip Nunaa, Lars Chemnitz-ip Nunaa, Oodaarsuup Nuugajuttaa, Qooqap Kangerlussua, Arnarulunnguup Qeqertaa, Poorsimaap Nunatarsui, Lars Emil Johansen-ip Kangerliumarnga, Aqissiap Iigartartua, Qeqertaq Pooq, Qiperup Kangerliumarnga, Sassuma Arnaata Itinersua, Inukitsupaluup Qeqertaa, Qaavigarsuup Kangerlua, Lumumbap Qeqertai, Aajuup Iigartartua,

Sorliit naleqqunneruppat? Danas Banke imaluunniit Tuusip Imarsua? Kejser Frans Josef Fjord imaluunniit Qaavigarsuup Kangerlua? Hertugen af Oléans Land imaluunniit Junnuup Nunaa? Alabama Nunatakker imaluunniit Poorsimaap Nunatarsui? Cap Ravn imaluunniit Oodaarsuup Nuugajuttaa? Walterhausen Gletcher imaluunniit Aqissiap Iigartartua? Franske Øer imaluunniit Lumumbap Qeqertai?

Academy Gletscher imaluunniit Aajuup Iigartartua, sorleq piukkunnarnerua?

Lille Hellefiske Banke imaluunniit Sassuma Arnaata Itinersua, sorleq kalaalerpalunnerua?

Prinsen af Wales Bjerger imaluunniit Kaassassuup Qaqqarsui, sorleq eqqornerua?

Fynske Alper imaluunniit Hans Enoksen-ip Qaqqarsui, sorleq Quujanarnerua?

Lille Pendulum imaluunniit Qeqertaq Pooq, sorleq torrannerua?

Illit qanoq isumaqarpit?